

Zulumskītė Aušrinė



Zulumskītė Aušrinė. Portėrapėjė ės A. Zulumskītės arkīva

Zulumskītė Aušrinė – pedaguogė, muokslėnė, kultūras darbuotojė, poetė. Ana gėmė 1970 m. kovo 29 d. Kretinguo. Muokies Kretinguos ontruojie vėdorėnie muokīkluo, pas-kiau – Šiauliū pedaguogėnemė institutė. Pu studėju dėrba pradėniu klasiu muokītuojė Kretinguos katalėkėšku vėdorėnie muokīkluo (dabar – Prancėškuonu gimnazėjė), bova tuos gimnazėjės dėrektorius pavaduotuojė ogdīmou.

Vieliau studijava Klaipiedas universiteta edukuoluogėjės doktorantūruo. 2000 metās igėjė socialėniu muokslu daktara laipsni, vo 2005 metās anā bova soteikts Klaipiedas universiteta duocėntės pedaguogėnis vards. Akademėnem darbou Klaipiedas universitė paskirė daugiau kap 25 metus, tėn pat, Pedaguogikas katedruo, darboujės lig pat šiuol. Ana ir dėrbosi ės Vītauta Dėdiuojė universiteta Kretinguos Šv. Antana religėjės studiju institutė, Klaipiedas Suocialėniu muokslu kolegėjuo, Lieto vuos versla kuologėjuo, Telšiū konėgū semėnarėjuo. Par muokslėnė darba metus ir parašiosi daugiau kap 60 muokslėniu straipsniu,

išleidosi tris metuodėnės kningas, ir trėjū tarptautėniu muokslėniu monografėju bėndraautoorė.

Jau devīnis metus Aušrinė dėrb ės Kretinguos rajuona kultūras cėntra rėngėniū organizautoorė, Kretinguos rajuona Dainū švėntiu režisierė. 2021 metās anā iteikta Kretinguos rajuona kultūras ės mena premėjė.

Aušrinė – aktyvos kultūras žmuogos. 1992–1998 m. vadovaujint režisieriou Radžiou Egidėjou bova Kretinguos kultūras rūmu liaudės tėtra (dabar – Egidėjaus Radžiaus tėtros), aktuorė, ir vaidenusi daugiau kap 80 spektakliu.

Ana ir ės trijūm eilieraštiu rinkėniū: „Didelis vilties pasaulis“, 1995 m.; „Ilgesio vėjas“, 1998 m.; „Laiko lelijos“ autoorė. Aušrinės kūrėniū ir atspausdinta almanakūs „Poezijos pavasaris 1999“, „Baltija 2002“, kninguos „Lietaus dvasia“ (2001 m.), „Kretingos krašto žodžio meistrai“ (2004 m.), perėjuodėniūs leidėniūs: „Literatūra ir menas“, „Gairės“, „Pajūrio naujienos“, „Švyturys“, „Šėiminėkė“, „Inžinerija“ ės kt.

A. Zulumskītė kap geriausė 1999 m. Kretinguos rajuona literatė ir apduovėnuota Bruonės ės Juona Liniausku premėjė. Tās patės metās anā bova soteikts Lietovuos muokītuojū literatu draugėjės „Spindulys“ organizouta konkursa laureatės vards.

Aušrinė jau šmuots metu bėndradarbiaun so ivairės kompozituorės kordama dainū tekstus vākū, ansambliu, choru, liaudėšku kapelu dainuoms. Tekstu anuoms jau ir parašita bemaž 100, skomb anėi Kretinguos koncertūs, „Dainū dainelės“ konkursūs, respublėkėnėis Dainū švėnties, televizėjės lauduos...

Puoseliedama žemaitiu kalba ana tonkė scenarėjus raša ės rėngėnius ved žemaitėškā.

Kalbedama aple žemaitėška literatūra, Aušrinė saka, ka žemaitiu kalba tink ne tik anikduotams „skaldītė“ ar balabeikuoms kortė. Sava gimtuojė muotinas kalbo gal poikiausė ės aple rimtus, jau trius rėkalus parašitė.

Eilieraštius ės pruožas kūrėnius ana raša ės lieto vėškā, ės žemaitėškā. Tarp žemaitėšku eilieraštiu – daug jumoristėniu kūrėniū. Aušrinė ketėn kumet nuors išlėstė dar kelės sava kūrības kningelės, nes literatūrėnė „materėjuola“ tor tėkrā ka daug. Vėsūm pėrma ta būtom vaikėšku eilieraštiu kningelė ės atskėrs rinkėnielis vėn so žemaitėškās tekstās.

Nauduota literatūra:

1. Paulauskaitė Birutė, „Aušrinė Zulumskytė“, *Kretingos rajono savivaldybės Motiejiaus Valančiaus viešoji biblioteka / Personalijos*: <https://www.kretvb.lt/personalijos/zulumskyte-ausrine/> (žr. 2022-04-15).

Paruošė Želvītė Danguolė